


高青邱詩醇

二



柳田文庫
文庫11
D 186
2



文庫11
D186
2

高青邱詩醇卷之三



伊勢 齋藤 謙有終錄

美濃 梁 緯公圖

紀伊 菊池保定士固

五言律詩

送曾主簿之平樂

路出桂江東。鄉音想未通。蛇飛山苦霧。鵬運海多風。
木魅長欺客。花蠻少學農。縣廳何處在。椰葉晚陰中。

春日懷諸親舊

楊柳燕差差。鄰家換火時。春寒添客思。夜雨減花枝。

高青邱詩醇 卷之三



010190558156

涉世悠悠夢懷人的思出遊無舊侶空館獨題詩

陪客登陶邱

相逢俱失意此地偶同遊獨樹邀人去斜陽為客留
依村煙景夕近水竹聲秋謾有歸歟歎何山是故邱

徐山人別墅

茶香孤墅發竹色四鄰分埽地侵蟲字開窗散鳥羣
樹涼池過雨苔潤石生雲我出無車馬偏宜訪隱君

客館秋懷

獨臥愁空館牆陰野豆開暑將潮氣斂秋與竹聲來
身賤多違志時清少棄材慙非張仲蔚門戶有蒿萊

秋夜宿周記室草堂送王才

相別還相戀秋宵暫對牀人情貧後見客況醉中忘
池柳疎含吹江雲薄護霜離舟待明發愁思劇茫茫

江上雨

冥冥眾樹昏浩浩一江渾急有回風韻輕無入霧痕
鳥啼叢竹嶺人臥落花村門巷春泥滑誰來共酒尊

送賈二進士歸省

年少擅詞華會看手入義晨裝歸路雨春酒別筵花
馬帶雲過嶺人同燕到家罷官趨覲好不是謫長沙

答宗人廉夜飲王氏池亭見懷

遙聞池上酌涼夜失炎天酒碧傾當竹衣香坐近蓮
沿波人弄月翻樹鳥鳴煙座上誰相憶惟應是惠連

何隱君小墅

移家營別墅一徑竹扉開泉滿疏渠放花多借地栽
壁閒田器挂窗裏浦帆來自戀幽居樂誰言是棄材
贈張明府

聞道彈琴處門前柳帶沙海珍通估市湖稅減漁家
暮港迷荷葉秋田閒豆花亂來無此地君政亦堪誇

送唐博士肅移家攜李

楊柳發初齊春陰廢苑西故人乘醉別新鳥傍愁啼

舟重全家去詩多一路題杏花開北郭誰復共招攜

畱別李侯

梅發津亭北春隨使節回線多遊子服酒滿故人杯
鐘送橫江雨車盤出峽雷平生感知已臨別更徘徊

寄熹公

禪居紫閣陰欲去問安心野岸隨流曲山門隱樹深
千燈燃雨塔一磬出風林想見跣趺處雲多不可尋
逢李止冰道人

吹簫月滿舟何處昔頻遊后土瓊花觀仙人黃鶴樓
別來應未老道在復何求相見俄還去江城楓葉秋

冬至夜喜逢徐七

君來同客館。把酒夜相看。動是經年別。能辭盡夕歡。
雪明窗促曙。陽復座銷寒。世路今如此。懸知後會難。

過戴居士宅

江邊戴顓宅。地好愜幽尋。高樹藏卑屋。新篁補舊林。
鳥成留客語。雲作護花陰。不負滄洲約。重來論夙心。

晚坐南齋寫懷二首

雁過南齋暮。魂消默坐中。賤貧長作客。愁病欲成翁。
窗灑侵燈雨。庭翻走葉風。山妻猶解事。未遣酒尊空。

其二

鳥成留客語

歲景看垂暮。羈踪歎屢遷。有身能去俗。無術但論天。
菊老江城酒。牀寒客舍氈。愁中還一笑。兒女滿燈前。

寄題崇明學宮天心水面軒

夜氣虛明際。齋宮息眾喧。詠餘風度瑟。坐久月當軒。
雲淨無留翳。池清有活源。心知此時意。欲論竟何言。

過劉山人園

欲問幽栖處。花蹊逐澗回。夕煙羅幕卷。春雨藥房開。
野鶴知琴意。山蜂給酒材。城中少閒客。誰解引車來。

次韻酬西園公

林驚綠樹鼠。池響食萍魚。月戶雙礎落。風亭一簞舒。

體便清夏健。髮映早秋疎。本自無愁事。何煩酒破除。
聞鄰家琵琶有感

清唱合琵琶。當年碧玉家。弄殘催酒急。抱重向燈斜。
久別愁江樹。重聽隔院花。淚多思舊事。不是客天涯。

送吳縣令遷松陵

山縣彈琴罷。江城露冕初。夏霖湖夏闊。朝日市長虛。
柳下催耕鼓。桑閒問俗車。秋風莫思去。客館有鱸魚。

和王止仲校理夜坐

池暝花如霧。蒼蒼月照開。梁空雙燕宿。簾暗一螢來。
兵散誰家笛。人違此夜杯。如何對清景。愁思卻相催。

酬余左司

門巷接垂楊。同鄰忘異鄉。兒親欣見熟。僕立厭言長。
讀借風牀簡。炊分雨碓梁。亂來成久別。能不為情傷。

宿道王蘭若

借榻到僧扉。雖安未是歸。暝禽愁雪意。夜篠助風威。
燈盡思燃帶。衾寒起覆衣。不知孤棹去。明夕更何依。

與詩客七人會飲余司馬園亭

居皆在北郭

情與酒兼和。園亭駐晚珂。家同榆社近。人比竹林多。
短景催長宴。醒吟雜醉歌。亂離歡易失。無厭數相過。

登西澗小閣

高青邱詩集卷之三
層檻構雲牢，清寒灑客袍。石稜添澗險，閣勢借峰高。
風竹驚栖鳥，霜藤縋飲猱。欲題因境勝，不敢易揮毫。
除夕客中與家兄守歲

雨雪遠村中，猿鳴旅館空。守爐銷夜漏，停燭待春風。
有恨能催老，無文解送窮。卻憐今夕酒，還得弟兄同。

南谿晚歸

流水出雲根，遙通古寺門。山深僧少俗，人靜市如村。
馬渡知長淺，魚行見不渾。多情谿上月，歸路照黃昏。

錢塘送馬使君之吳中

樟亭離席散，遙發畫幡車。飛雉新阡麥，啼鶯故苑花。

望山登郡閣，行水到田家。莫道凝香句，前人獨可誇。

草堂夜集

山家具雞黍，夜與故人期。暫喜逢歡會，都忘在亂離。
火寒移坐密，燭盡得詩遲。莫聽高城角，明朝別又悲。

王公子宅五月菊

吳郡王君明仲清獻公之孫也時至正甲辰

秋英忽夏發，宛在阿戎家。細認驚初見，高吟喜共誇。
不依寒竹雨，欲映午榴霞。我意甘遲暮，尊前有此花。

曉步園池

髮隨秋葉落，心共曉雲舒。稍改新題句，渾忘舊讀書。
林爭移樹鳥，池響食萍魚。無限悠然意，涼天獨步餘。

次韻過建平縣

縣雖三戶小地僻罷兵防
茶市逢山客楓祠祭石郎
雲埋鳴澗斧沙膠度谿航
應愛青山好經過駐旅裝

雨篷

楚雨滿汀洲瀟瀟灑客舟
夢驚孤枕夜愁掩一篷秋
葦葉寒相戰灘聲暗共流
此時湘浦上同聽只沙鷗

夜訪芭蟾二釋子因宿西澗聽琴

清夜獨幽尋巖扉落葉深
許攜陶令酒來聽穎師琴
人醉月沈閣鳥啼風滿林
應畱西澗水千載寫餘音

與劉將軍杜文學晚登西城

木落悲南國城高見北辰
飄零猶有客經濟豈無人
鳥過風生翼龍歸雨在鱗
相期俱努力天地正烽塵

和周山人見寄寒夜客懷之作

亂世難為客流年易作翁
百憂尋歲暮孤夢怯山空
門掩雲峰裏燈明雪竹中
無因乘夜訪相慰一尊同

城西客舍送周著作砥

客中寒食後惆悵送君違
花隱歸城旆風吹渡水衣
夜窗炊黍散春苑鬪茶稀
誰念西齋雨相思獨掩扉

江上早發

蒼蒼汀霧起何處望高城
游子曉初發居人寒未耕

犬鳴林月落。魚躍浦風生。已有先行者。煙中間棹聲。
客舍喜姪庸至。

客裏逢人喜。相過况阿宜。遠遊驚歲晚。多難惜門衰。
帆落江橋近。鐘來野店遲。一杯燈下語。渾似在家時。

楓橋送丁鳳

紅葉寺前橋。停君晚去燒。醉應忘世難。歸不計程遙。
山隱初沈日。風催欲上潮。離魂來此處。還似灞陵銷。

丁孝廉惠冠巾

知試山人服。冠巾遠寄重。佳名因子夏。舊製學林宗。
裏映秋吟鬢。敬宜晚醉容。朝簪今已解。期上華陽峰。

西園閒興二首

看到竹過鄰。園林獨臥身。鳥聲閒似野。人意倦如春。
殘雨驚池樹。斜陽照隙塵。如何堂上客。不及燕來頻。

其二

當路闕追攀。端居自掩關。聽鐘知近寺。看畫憶登山。
曉櫛風林下。宵吟雨閣閒。天應憐我懶。獨與少年閒。

送謝恭

涼風起江海。萬樹盡秋聲。搖落豈堪別。躊躇空復情。
帆過京口渡。砧響石頭城。為客歸宜早。高堂白髮生。

郊墅雜賦十六首

江水舍西東，鄰家是釣翁。路痕深草沒，井脈暗潮通。籬隔蔬邊雨，門開竹下風。不因時賣畚，何事入城中。

其二

此鄉堪避地，亂後戶翻增。俗美嫌欺客，年豐愛施僧。帶星耕處，輒照雪紡時燈。且作求田計，元龍豈我能。

其三

幽事向誰誇，孤吟對晚沙。浣衣江動月，繫艇岸垂花。行蟻如知路，歸鳧自識家。一尊茅屋底，隨意答春華。

其四

春泥桑下路，孤策自扶行。身賤知農事，心閒見物情。

鳥鳴風欲起，牛飯月初生。漸喜無人識，何煩易姓名。

其五

移家到渚濱，沙鳥便相親。地僻偏容懶，村荒卻稱貧。犬隨春饁女，雞喚曉耕人。願得無愁事，閒眠老此身。

其六

紛紛謝人役，寂寂戀吾居。細雨春零後，斜陽社飲餘。岸花飛趁蝶，池葉墮驚魚。好了公家事，休令吏到廬。

其七

路迂橋斷處，門靜犢眠時。孤墅藏羣柳，諸田灌一陂。僮閒春作少，婦懶午炊遲。誰道花源好，還令太守知。

其八

虛閣近鳴湍。應空把一竿。雨傷春麥爛。風折晚蒲乾。
抱甕臨江汲。攜書入寺看。自慚何獨幸。世難此偷安。

其九

亂渚交交白。平蕪漫漫青。賣薪沙店遠。祈穀水祠靈。
密雨侵蓑重。微風過網腥。江邊多酒伴。春去不曾醒。

其十

入夜潮侵戶。經秋雨壞垣。里人淳少訟。田父醉多言。
稻蟹燈前聚。莎蟲機下喧。自應耽野趣。不是戀鄉園。

其十一

欲沽嗟市遠。煙火隔江波。客到寒齋少。人歸晚渡多。
汗書燈燼落。驚枕艫聲過。豈敢愁荒寂。時危免負戈。

其十二

野色迴蒼蒼。開門葉滿塘。僧來雙屐雨。漁臥一船霜。
靜裏修香傳。閒中錄酒方。平生當世意。到此坐成忘。

其十三

紅樹南江近。青山北郭遙。江清目渺渺。林冷髮蕭蕭。
食鱸知晨釣。聽歌識暮樵。尋常送歸客。不過水西橋。

其十四

何處可徘徊。林閒共水隈。夜歸家犬識。春睡野禽催。

有地唯栽藥，無村不見梅。興來慙獨飲，時喚老農陪。

其十五

狂多愛出遊，日日問江頭。小草皆春意，遙山自晚愁。酒中時有得，物外復何求。不詠騷人調，薜蘿任滿洲。

其十六

居似臨邛宅，耕非鄆杜田。已償輸稅米，未覓賣文錢。把卷憐長日，看花愧少年。翛然閉門處，楊柳桔槔邊。

送易從事祖飲南渚

疎楊映老荷，別處最秋多。送客年年路，愁人日日波。霞明添醉色，風急斷離歌。莫為官程促，青山易看過。

夜懷王校書

燈暗獨吟餘，疎桐月滿除。蟲寒初入戶，鼠餓欲侵書。河漢三更望，江湖兩地居。相思無去夢，今夜恨何如。

夜投西寺

江月上秋衣，來敲遠寺扉。栖禽驚客至，睡僕訝僧歸。鐘度行廊盡，燈畱俗院微。非無招旅館，禪寂願相依。

送石明府之崑山

茂苑行春罷，攜琴又向東。潮聲數里外，山色半城中。帆帶桃花雨，衣翻柳葉風。島夷聞善政，為有舶船通。

過城西廢塢

亂前遊最熟。亂後問都迷。園散栽花戶。林荒采菊蹊。
廢泉流圃淺。斜日下城低。唯有煙中鳥。迎人似舊啼。

喜呂山人見過江館

非君憐夙契。誰有顧柴門。日短清江路。風高大樹村。
交呈新著藁。同發舊藏尊。莫便尋歸櫂。心懷未盡論。

贈鄰友

同居一塢中。只隔水西東。林近書燈露。谿回酒舫通。
放鳧長合隊。移竹每分叢。只恐君徵起。難期竹兩翁。

送顧別駕之邊郡

故人雖盡別。相去獨君賒。緣路雲千堠。臨邊樹一家。

渡江船載馬。到館燭驚鴉。莫歎孤城廢。春來尚有花。

送僧恬歸靈隱

遊方應未久。柳色變新年。在路逢春雪。還山訪冷泉。
鐘催投寺錫。燈照泊江船。法意休多問。無言卽是禪。

江上寄王校書行

寥落舊歡違。江邊獨掩扉。鄰家聞暮笛。客舍試春衣。
宿鳥歸山亂。行人渡水稀。相思比花絮。斜日繞城飛。

送孫主簿之德清

山水匝秋城。君行思已清。道逢迎吏拜。田雜戍人耕。
地遠知邊信。家貧稱縣名。應攜一琴去。相和長官鳴。

送張司勳赴寶慶同知

乍出司勳幕，還乘別駕車。
按圖猶漢地，輸布盡蠻家。
山熱蛇懸樹，江晴鶴浴沙。
郡樓回首處，北斗近京華。

寓天界寺

雨過帝城頭，香凝佛界幽。
果園春乳雀，花殿午鳴鳩。
萬履隨鐘集，千燈入鏡流。
禪居容旅跡，不覺久淹留。

送前進士夏尚之歸宐春

淒涼庾開府，老去復如何。
故國歸鴻少，新朝振鷺多。
菊荒應自歎，麥秀竟誰歌。
相送堪愁思，蕭蕭楚水波。

夜逢故郡賀冬至使胡浦二博士同宿

會宿本無期，忻逢兩舊知。
問年驚別久，候曉畏朝遲。
寒澀高城漏，陽回上苑枝。
明朝使事畢，歸騎又天涯。

至日夜坐客館

久客漸忘家，今宵忽感嗟。
旅蹤猶泊榷，陽氣又吹葭。
巷屋門封雪，鄉關路遶沙。
閨中想逢節，也解憶京華。

送鮑翰林遷官陝右

鑾坡初罷直，西去惜離羣。
載筆唐供奉，褰帷漢使君。
濁流河驛雨，高樹嶽祠雲。
公暇應懷古，登臨賦夕曛。

送姚架閣

芳晨悵別筵，新柳驛亭前。
客散春城酒，人登暮雨船。

江樓先見日，郡界遠臨邊。到後安民俗，應知從事賢。

送陳則

挾策去誰親，侯門不禮賓。愁邊長夜雨，夢裏少年春。樹引離鄉路，花驕失意人。一杯歌短調，相送欲沾巾。

宴王將軍第

流水通侯第，行雲傍妓臺。雨催牙仗散，風引羽觴來。曲學移聲按，詩隨得韻裁。莫令遊宴歇，次第過花開。

春日退直呈禁署諸公

待詔直東華，歸休每日斜。職連詞客苑，俸入酒胡家。檐網長縈絮，庭甌欲過花。知君未出院，應草侍中麻。

京師寓廨錄一首

寂寞過芳時，幽懷只自知。袖無投相刺，篋有寄僧詩。鼠跡塵凝帳，蛙聲雨到池。疎慵堪置散，不敢怨名卑。

送舒徵士考禮畢歸四明

寄語關門吏，休輕尚布衣。叔孫聊應召，周黨竟辭歸。赤日京塵遠，蒼煙海樹微。送君還自歎，老卻故山薇。

暮春送陳郎中出守櫟李

出幕方為郡，行車動畫輪。圖書歸省吏，風俗問州人。塘水龍鱗細，城槐兔目新。莫言花已盡，君到自陽春。

寄杜二進士

花開寄別離。花落正相思。交誼多年見。鄉愁近日知。我方淹上國。君豈老明時。試問江干閣。同登復共誰。

夜宿太廟齋宮

鳥散廟堙空。清香肅闕宮。太常齋禁密。列祖享儀崇。井叩銅瓶月。墀鳴玉珮風。聽鐘候車駕。庭燎已燿燿。

送王員外遷崇教崇教典

能書晉公子。清宦稱高情。海樹朝帆遠。江風夏服輕。官從三省去。僧出萬山迎。誰說簪纓客。名林得按行。

送潘巡檢之閩中

京師到閩海。秋色幾程餘。莎柵山兵守。榕林島戶居。

曉衙雞應鼓。晚邏騎隨車。清世元無盜。將軍好讀書。

和友人過采石

山暝斷磯頭。猿聲兩岸愁。柳閒倡女酒。月下估人舟。擒虎嗟橫渡。騎鯨憶醉遊。停橈正懷古。風急葦花秋。

早出鍾山門未開立候久之

關吏收魚鑰。趨朝阻向晨。忘鳴雞睡熟。倦立馬嘶頻。柝靜霜飛堞。鐘來月墮津。可憐同候者。多是未閒人。

贈張省郎

漢署早為郎。長遊鳳沼傍。雞知壺水候。馬識火城光。每載趨曹筆。時熏直省香。邊書無一羽。冠蓋得翱翔。

池上晚酌

夕陽初雨後。團扇送涼過。竹裏方歸鳥。沙邊尚浴鵝。
脫巾懸峭壁。流學逐回波。六逸當年樂。何如此處多。

題谿山小隱

何處谿山隱。衡門對野橋。晚風攜鶴子。春雨種魚苗。
小徑斜通竹。疎籬曲護蕉。人生閒自足。不問楚辭招。

送客歸閩省親

秋城聞暮砧。歸思忽盈襟。客久依人遍。親衰念子深。
青山分嶺路。紅荔到鄉林。菽水還堪樂。何須季子金。

圓明佛舍訪呂山人

憐君不出院。結夏與僧同。陰竹行廊遠。香花掩殿空。
飯分齋鉢裏。書寄藏函中。茶宴歸來晚。西林一磬風。

喜了上人見過

幾時西澗別。忽喜過家園。澹泊林閒供。虛空世外言。
豆花零晚架。瓜蔓絡秋垣。莫厭頻相過。衡門久息喧。

冬至夜雨感懷

節序關何事。徒令百感生。升沈當世事。存沒故人情。
寒壯微陽氣。風疎緩漏聲。他年說今夜。聽雨宿南城。

臘月廿四日雨中夜坐錄一首

身退惟宜靜。謀疎且任真。樓空三日雨。書亂一牀塵。

邱隴多良友。江湖獨放臣。莫嗟年景暮。轉眼是新春。

送胡鉉遊會稽

山水獨行遍。茗谿仍剡谿。衣逢新火減。舟渡雜花迷。
黃絹尋碑讀。紅裙賭墅攜。清遊不能共。腸斷聽猿啼。

沈徵士鉉野亭

清時猶在野。獨臥見高情。移艇聞煙唱。鉤簾看雨耕。
江晴雙鶴下。樹晚一牛鳴。回首徒相憶。柴車不入城。

谿上

秋色共谿長。遊人語笑涼。萍開天倒影。蓮墮水流香。
魚罾和星漉。禽罟帶雨張。從今搖桂櫂。不必問瀟湘。

寄錢塘諸故人

年少客名都。狂遊每共呼。荷深箏在舫。竹靜矢鳴壺。
明月潮千里。殘陽雨半湖。故人能念否。歡意近來無。

送烏程馮明府

青山若下南。一騎入晴嵐。縣治琴聲古。泉香酒味甘。
竹欄春護鴨。葦箔夏分蠶。大小馮君後。傳家爾最堪。

病目

閉目洗黃連。深窗坐兀然。未忘聽鳥興。暫絕看花緣。
問女知檐日。嗔奴畏竈煙。願因無見處。得證定心禪。

賦得蟹送人之官

吐沫亂珠流。無腸豈識愁。香奩橙實晚。肥過稻花秋。
出籬來深浦。隨燈聚遠洲。郡齋初退食。可怕有監州。

吳中送顧生歸海陵

涼風初變柳。歸興片帆孤。家向三秋到。田經幾歲蕪。
舊音猶帶楚。新夢未離吳。明日江南北。相思有雁無。

園中

席煖林中憩。衣涼水上歸。腐瓜蟲食徧。空樹鶴巢稀。
邂逅幽尋得。參差薄願違。喜無來往者。秋草沒園扉。

倦客豈遷客。故鄉非異鄉。鱸肥蓴菜紫。雁到柳條黃。

晚霽獨酌南樓

湖闊已秋雨。樓高猶夕陽。登臨何必賦。把酒據胡牀。

贈東菴道者

雙樹夾成戶。一谿流繞家。埽林畱筍汲。水帶浮花。
經勸里人讀。藥從山客賒。已無喧寂念。默坐對鳴蛙。

樂圃錄三首

幽居無灑埽。風景自翛然。紅溼花閒雨。青分柳外煙。
山窗捫蝨坐。石榻枕書眠。自得閒中趣。栽花疊錦川。
五言排律

賦得履送衍上人

穩稱遊方腳。新編楚岸蒲。滑欺峰頂石。危怯世閒途。

衍上人

輕曳愁妨蟻高飛笑化鳧上堂聲每眾度嶺影還孤
著處朝行道拋時夜結趺空山欲相訪落葉去踪無

送安南使者杜舜卿還國應制

并序

安南初入貢朝廷遣翰林學士張以寧齋詔冊
其主爲王及境而薨其世子遣舜卿告哀且請
命及還命朝臣賦詩送之

南粵知文化來庭喜最先地書通漢日貢紀入周年
號冊纔臨境容衣忽掩泉使蒙天語信嗣許國封傳
曉闕晴飛鳳炎谿晚墮鳶往來時物異存沒聖恩全
詔去開蠻霧帆歸望海天但修忠順節世業自綿延

戲嬰圖

芍藥風欄側梧桐露井旁嬌嬰爭晚戲少婦鬪春妝
共詫珠生蚌還憐玉產岡半披文錦襖斜佩紫羅囊
額髮歲鞋短胸胞細膩光庭前王氏子陌上衛家郎
弱草身眠軟芳英手弄香隨人貪作劇避伴學迷藏
莫撲花蝴蝶宜爲蠟鳳凰塗漆雲母粉浴試水沈湯
麟送徐卿宅蘭生謝傅堂愛均看總好年竝比誰長
驥種雖難匹鵠雛已作行欣君得此畫真是夢熊祥

焚香

艾蒨山中品都夷海外芬龍洲傳舊採燕室試初焚

奩印灰縈字。爐呈玉鏤文。乍飄猶奄母。將斷更氤氳。
 薄散春江霧。輕飛曉峽雲。銷遲憑宿火。度遠託微薰。
 著物元無跡。游空忽有紋。天絲垂裊裊。池浪動沄沄。
 異馥來千和。祥霏卻眾葷。嵐光風卷碎。花氣日蒸醺。
 燈地宵同歇。茶煙午共紛。褰帷嫌放早。引匕記添勤。
 梧影吟成見。鳩聲夢覺聞。方傳媚寢法。靈著辟邪勳。
 小閣清秋雨。低簾薄晚曛。情慙韓掾淦。恩記魏王分。
 宴客畱鵷侶。招仙降鶴羣。曾攜朝罷袖。尚浥舞時裙。
 囊稱縫羅佩。箒宜覆錦熏。畫堂空擣桂。素壁漫塗芸。
 本欲參童子。何須學令君。忘言深坐處。端此謝塵氛。

舞劍

與會稽張憲飲觀銅臺李壯士舞劍而作
 晚陌息鳴鑣。憲秋城起嚴柝。登堂欣有會。啓顧座歎
 無樂。豪賓奉觴壽。憲壯士掉箭作韻生。臙拂鐔。啓文
 綴星輝。鏑拭土色纔動。憲映火光轉爍。寒瀉走澗泉。
 啓明懸溜檐澤。徒誇刀瑩膏。憲漫詫匕淬藥。腥疑人
 血乾。啓威攝鬼踪。鑠雄聞莊子說。憲醉想王郎斫。聯
 翩倏鴻騫。啓奮迅仍雀躍。來如龍出淵。憲去若蛇赴
 壑。疾驚雷破山。啓怒訝風捲漠。初馳帆縱張。憲忽注
 弩弛彊。陰陽變開闔。啓潮汐隨進卻。高步赴節同。憲

奇形分狀各斜回象翼蔽啓曲踊宵拏攫歛驚西方
 帝憲凜怖東海若屋翻影紛綸啓地殷勢揮霍亂思
 突騎奔憲低見飢隼掠旁分萬矢斷啓前拉千槍拓
 出堪劫齊壇憲立可當蜀閣澤聞蛇嫗啼啓路遇猿
 翁搏斬關豁然判憲擊柱鏗爾著陸疑濤涌牀啓宵
 駭虹闖幕警栖已翻翻憲墜槁俄索索顛旭曾悟書
啓俠軻記爭博目花匪酒涵憲膚粟似裘薄忠義氣
 盡張啓姦邪膽俱落不從玉玦計憲欲定銅磐約未
 數大娘強啓終勝處女弱季路袖手欽憲裴旻汗顏
 怍疾視誰敢當啓不成我慙學勇夫怒生癭憲恐僕

戰成瘡功收刺虎奇啓志感聞雞惡暫停月徘徊憲
 既罷天寂寞崆峒詎必倚啓氛禮行可廓馘妖正思
今憲斷佞猶慕昨會合固有期啓死生良欲託寧憂
 武庫火憲但俟凶門鑿慷慨勿悲歌啓淋漓且酣酌
憲

